

**Nzryr-krbz Pol Krali Mz Lr
Korint
Natq Ngr Nzaplxtqngr Mz
Nzryr-krbz Pol Krali Mz Lr
Korint**

Mzli kc tqmncngr Aposol Pol mz taon Efisz, yrbzle 'Nzryr-krbz Pol Kx Ayrnrngr Mz Lr Korint.' Mz letz lc, rpile kx Timoti sa naoklatile nidr x mz nibrde nayzlu-mop bade. ✧ Opx angidr kx Timoti pibzle mz Pol kx kzdung aposol kxnalzvtr-rbrng kcng tzprtrng mz lr Korint nzbatrpzlr badr nzrlxngiti-krdr kx Pol trngiu aposol angidr. Zbz Pol oklatile nidr mzli kxpipz kx trmrlz-etr-ngru drtwrdr, x nzycmne-krbzle badr pqtx zlwz. ✧ Zbz sc tqyzlupe mou Efisz x pnzpe drtwrde nzatwzlr-krbzle Taetus badr, mz nzokatr-krde nztekqtr-krdr nqm q nr drtwrdr. X kzdung mzli mz nibrde, rlaszle taon kc Efisz, x rmctile Taetus mz Masedonia Provins, mz nyzlu-krbzle bade, mx mz taon kc Filipae. ✧ Mzli lcde, yiz esz' mz nibr 'Nzryr-krbz Pol Kx Ayrnrngr Mz Lr Korint,' yrbzle letz lc, mx mz mzlr yiz 55—56 AD mz nibr nzmncngr mz Jisz. X Taetus twzbzle letz lc mz lr Korint. ✧ Zbz sc tqoklatipe Pol nidr mz nzwrde kratq. X mz nzmnc-krde kc mz Korint, yrbzle 'Nzryr-krbz Pol Mz Lr Rom.'

Mz letz lc, awi-ngrbz Pol mz Gct lr Korint

✧ : 1 Korint 16:10-11 ✧ : 2 Korint 2:1; 12:14; 13:1-2 ✧ : 2 Korint 2:12-13; 7:5-16 ✧ : 2 Korint 8:16-24

kcng tzteqtrlr nqm̄ nr drtwrdr, x rlx̄tibzle
mz krkcng tzxpqbrlr-ngrdr nide kx natekqtr-
kzlr nqm̄ nr drtwrdr. Pibzle badr da kqlu mz
nzaelwapx-krde kx nide aposol angidr.

Mrkcng Mz Letz Lc

Gct amqtr-zvzle drtwr kxnzrlxngiting. [1:3-11]
Pol ayz̄lubzle natq leplz kcng tzipilr kx da kcng
tqpile pokia-ngrde. [1:12—2:4]

Lr Korint naipqlr kztedrng kcng tzteqtrlr
nqm̄ nr drtwrdr mz alwx ngrdrng. [2:5-13]

Kxnzrlxngiting nzaovxio-zvzlr Setzn mz
nzaxvctr-krbzlr mz Kxnzmcp̄x. [2:14-17]

Pol nide angidr aposol murde nqm̄ kr lr
Korint mrlz. [3:1-6]

Nzesz'tikr Drtwr Gct Kxmrna badr leplz ne-
deng myaszpx-zlwzle krkc kai mz Lou Sc
Mosis. [3:7-18]

Kxmu nqm̄ kr Pol mz nzwz-krde. [4:1—6:13]

Nimu kxnzrlxngiting bzkq axvctr-lzbq̄bzmu
mz kxtrnzrlxngitiung. [6:14—7:4]

Taetus rlwa-ngrbzle mz Pol nrpa ngr lr Korint
kxnzrlxngiting. [7:5-16]

Nzataktilr trau mz nzwzkr lrmakxtr. [8—9]

Pol ayz̄lubzle natq leplz kcng tzipibqtilr nide.
[10—12]

Pol lc-apq-mopwzle mz leplz kcng tzipwa'-
ngrbzlr nzwz-krde. [13:1-10]

Pol pibzle natq ngr nzarlr-lzbq̄ngr. [13:11-14]

¹ Ninge Pol kc tqkqle Jiszs Kxnzmcp̄x mz
nzngini-krnge aposol nede mz nzvz-nq̄blq-krde
me pnz drtwr Gct. Nigr ncd̄r mzlegu Timoti
rpibzkr bamu kx, “Nimu la!” Ryrbo bamu, nimu

lr makxtr ne Gct kx nzmncng mz taon kxetu Korint, x kxnzrlxngiting kc-kzng mz provins kc Akaia. *

² Krka'-ngrne kx Trtegu Gct x Kxetu rgu Jiszs Kxnmcpx nakabzlr bamu zmrlz ngrdr kxmyalz x nzmnc-zpwxngr.

Gct Amqtr-zvzmle Drtwrgu

³ Naglqlzku Gct x na-awi-ngrbzku bade, mz nznngini-krde Trte Jiszs Kxnmcpx, Kxetu rgu. Murde yc zvz mz drtwrde nigu x amqtr-zvzmle drtwrgu. ⁴ Mz nzapqtr-zvz-krmle lc drtwrgu mz nzxpxu-krqu, krlz-kzku nzapqtr-ngrbz drtwr kztegunng mz nzxpxu-krdrng, mz nzvz-nqblq-krde nqm q kr Gct mz nzapqtr-krmle drtwrgu.

⁵ Leplz nzaetq-zvzbzlr drtqgu mz nzaxvctr-krbzku mz Jiszs Kxnmcpx, da kc tqwai nzaetq-zvz-krbzlr drtqde. A' mzli lcpwz, apqtr-zvzm Gct drtwrgu, da kc tqwai nzapqtr-zvz-krbzle drtwr Jiszs. ⁶ Mz nzm-krde lcde, kxmule-esz' drtqgr nzaetq, nigr aposol, o drtwrgr nzapqtrpqnng, a' da lcng li ngi dalr nzokatrngr nimu. Murde nzetqkr drtqgr okatrle nigr mz nzapqtr-krbzkr drtwrmu mz nzetqkr drtqmu. X mz nzapqtr-krm Gct drtwrgr mzli lc tqtrka, okatrle nimu mz nztu-amqngi-zvz-krmu mz nzbtrtkr drtwrmu nide, kxmule-esz' drtqmu etq, da kc tqwaikr mz nzetqkr drtqgr. ⁷ X lxngiti-angidrkr kx natu-amqngi-kzamu, murde mz nzprtr-krmu mz nzetqkr drtqgu, nigu kxnzrlxngiting, sa naprtr-kzamu mz nzapqtr-krm Gct drtwrgr.

* **1:1** Korint nide taon kxmyapxbz mz Akaia Provins, mz nznngini-krde mzteadau ngrde. Mzli ka provins lc yc mz kandre kc Gris.

8-9 Mzlangeng x inwengeng, nakrlz-angidramu kx mzli kc tqmnc-ngrgr mz provins kc Esia, leplz nzaetq-zlwzbzlr drtqgr. X nzxplr-krgr trtak-itrdeu nztu-amqngi-krgr mz nzxpu-krgr lcng. X mz drtwrgr, ycpe pipz nzbz-krgr. A' Gct rlr-ngrmle da lcng, murde bzkq brti drtwrgr nzxplr-krgr esz'-krgr, a' nabrti drtwrgr nide kc tqat-ulzmle leplz mz nzbzngr mz zmatq ngrde. ¹⁰ Zbz mzli lc, Gct sc tqarlapxpele nigr mz nzbzngr. X abrtxtrpwxkr drtwrgr bade mz nzarlapx-zvz-krde nigr mz da kznikeng naprtzmqng bagr kalr. ¹¹ Murde mnc-xgle-kzkr nzprtr-krbzmu mz kztegunng mrkang kqlu mz nzkrka'-krbzmu mz Gct nzokatr-krde nigr. X mz nzayzlu-krbzle nzkrka'-krmu, nimu kxnzkqlung sa na-awi-ngrbzmu bade zmrlz ngrde kx avzomle bagr. ☆

Pol Ayzlubzle Natq Leplz Kcng Tzrpilr Kx Da Kcng Tqpile Pokia-ngrde

¹² Krlz-angidrx mz nabznge kx nqm q krnge mz nzmnc-krgr badr leplz mrlz x tubq, myapxbz mz nzmnc-krgr. X abrtzlvzx da lc. Murde trvzpxpuu mz nzyrplapxkr leplz, a' vzpxm mz zmrlz ngr Gct kc tqokatrle ninge. ¹³ Pibo da lc murde suti drtwrnge kx nakrlzamu kx da amrlx kcng tqyrbo bamu mz letz scngeng nzopx-angidrng x tryrlq-kapqwxu drtwr ngrdr. ¹⁴ Krlzmle mzli ka, kzdung nimu trnzkrz-zpwxkalr kx nzmnc-krgr badr mrlz x tubq zvz, a' ycpe pipz nimu amrlx nzbrtikr drtwrmu ninge. X mzli kc nayzlu-ngrm

Kxetu rgu Jiszs, sa naglqpx-lzbq-ngrnamu ninge, da kc tqwai nzglqpx-lzbq-krnge nimu mzli ka. †

¹⁵⁻¹⁶ Mzli lc tqryr-ngrbo bamu, lxngitix kx amatqamu ninge, x pibo bamu kx nzoklati-krbo nimu nzwrde nali, mzli kc mz nzvz-krnge mz Masedonia Provins, x mzli kc nayzlu-ngrmc. Murde suti drtwrnge kx naokatramu ninge mz nzvzne-krnge Judiz Provins. X nzm na-alepex da lc, natwzpeamu da kxmrlz mz nzwrde lcong li, murde mz nzamrlz-krmu ninge, Gct sa na-amrlz-kzle nimu. ¹⁷ Kxmule-esz', a' mz nibrde tekqtrx drtwrnge. A' trngiu drtwr ngrde kx nzymne-krnge ycmne-abeane. Murde mz nztekqtr-krnge drtwrnge, trvz-nqblqwxu da kx mrlzm bange, da kc tzwai kxtrnzrlxngitiung, a' vz-nqblqx me pnz drtwr Gct. Trpnzngr nzpokia-krnge mz nzrpi-krnge da kx na-alex. ¹⁸ Da kc tqwaiamu mz nzbrtipekr drtwrmu Gct nzatutr-krde natqdeng, takitrde nzbrti-kzkr drtwrmu ninge, murde trpnzngr nzrpi-krbo bamu kx, "Eu" x "Trtingr" mz mzli kcpwz. ¹⁹ Murde vz-nqblq-zvzx Jiszs Kxnmcpx, Mrlx Gct, x nigr badr Saelas x Timoti yapwxtipxbzkr nide bamu. X Jiszs trpnzngr nzrpi-krmle bagu kx, "Eu" x "Trtingr" mz mzli lcpwz, a' atutr-zvzle natq Gct mz nzmnc-krde. ²⁰ Mz nzwzkr Jiszs, Gct sa tqatutr-zvzle da amrlx kx esalz-ngrbzle mz leplz nedeng.

† **1:14** Mzli kc Gct naobqtr-ngrde mz nqm qrgu kalr, takitx-trpwzle nzglqpx-lzbq-krge mz leplz kcng tqokatrku mz nzvz-nqblq-krdr Jiszs. Nzmu lr Korint nzokatr l Pol mz nzkrka'-krdr nide, takitrde nzglqpx-lzbq-krdr mz nzngini-krde kxmailz kxmrlz. X Gct sa na-amrlzle nidr mz nzokatr-krdr nide. A' nzm naptxpx-ngrdr nide, trnatwzlru zamrlzkr Gct lc nidr.

X mz nzkrzlz-krngu da lc, glqlzku Gct mz nzrpi-krbzku bade kx, "Eu, da zpwxtx kx atutr-zvzq nzesalz-krmqng." ²¹ Sc tqamqngi Gct nzrlxngiti-krngu mz nzaxvctr-krbzle nigu mz Kxnmcpx. X mcpx-kzle nigu. ²² X avzomle Mqngrkxtr mz nzmncpx-krmlle mz nabzgu, murde nangingide rxx kx nigu leplz neng Gct kcng natwzlr da amrlx kcng tqesalz-ngrmle bagu.

²³ X ni-kzde Gct kx krlzle kx trpokiawxu. A' tekqtrx drtwrnge mz nzoklati-krbo nimu nzwrde krali, murde ma tqpnanati-moux nimu mz alwx ngrmung. ²⁴ Bzkq rpianu kx suti drtwrnge nzmnclz-krmamumu bange mz da amrlx. A' da kx suti txpwz drtwrnge nzvz-lxblz-krngu murde na-abrtzamu mz Kraes. X krlzx kx tu-amqngiamu mz nzrlxngiti-krmu. ‡

2

¹ Aoti zvz drtwrnge nzoklati-krbo nimu. A' pnz drtwrnge kx mrlz trnzoklati-krpou nimu mzli lc, murde ma tqbatrpo nzvzkr drtwrmu. ² Murde mz nzbatr-krbo nzvzkr drtwrmu mz nzpnanati-krnge nimu, drtwrnge vz kz. X trpnzngi kx na-aelalzmle drtwrnge. ³ Mz nzmukrde lcde, yrbo letz lc bamu mz nzpnanati-krnge nimu, murde natekqtramu nqmq nr drtwrmu

‡ **1:24** 1:19 Ncblo kc tqngi menrpa na-ale-zvzle da kx na-abrtzlvzngi kxetu rde nide, murde ma tzobqszo leplz badr kxetu rde. 1:22 Nzrlxngiti-krngu x nzvz-krngu kc tqaprem Gct bagu nztuong mz nzxpkr Gct, a' trngiu mz nzxpkr-krngu esz'-krngu. 1:23 Pol pnanati-kaile nidr mz letz, murde namnc-zpwxng badr mzli kc tqoklati-ngrde nidr.

x sc tqoklati-atebo nimu. Krlzpex kx mz nzvz-nqblq-krmu natqnge lcng, dekc na-abrtzlvz-ngrne nqmq krmu x na-abrtzlvz-kz-ngrnamu ninge. ⁴ Drtwrnge talvzo x yrni-kzx mzli lc tqyr-ngrbo letz lc bamu, murde alwx ngrmung x nqmq nr drtwrmu abaomle nabznge. Ryrbo bamu murde nakrlzamu kx mrlzti-zlwzx nimu, a' trngiu mz nzbatr-krbo nzvzkr drtwrmu.

Kztemung Kcng Tztekqtrlr Nqmq Ngr Drtwrdr Mz Alwx Ngrdrng

⁵ Mz letz kc pnz, pibo bamu kx na-ayrplapxamu ncblo kc tqbatrpzle nzcxpungr lcng. Trmrlzu nzrpi-krnge kx alwx rde etu zlwz, a' nzatrkatikrde nimu myaszpxle nzatrkatikrde ninge. ⁶ Murde mzli ka tekqtrpele nqmq nr drtwrde. X nzayrplapx-krmu nide nayrkrpx. * ⁷ Bzkq yc zvz mz drtwrmu alwx rde, a' namrlztrpzmu drtwrde, murde nabzde ma tq-talvzo zvz x sc tqyrlqpx-lzbqpe-ngrde mz nzl-xngitingr. ⁸ Mz nzmukrde lcde, rngidrlvz-ngrbo bamu kx mrlx lc nakrlz-angidrlle kx mrlzti-mouamu nide x suti drtwrmu nzprtr-moukrde mz nzodutr-lxblr-krmu badr. ⁹ Pnanati-ngrne nimu kz mz letz lc, mz nzobqtr-krnge kxmu nzvz-nqblq-krmu natq kx kapxbo bamu kx namnc-zpwxtr-ngrbzmu mz Gct. ¹⁰ Vz-nqblqpeamu

* **2:6** Mwx ncblo lcpwz dekc tqyapwxtipx Pol mz 1 Korint 5:1-5. Mz nzayrplapxkr lrmakxtr nide, nzmaszlrpx-ngrdr nide mz makxtr x ma nyzdr x trnzrlr-ngrpwzlrzru nzprtrkrde mz Nzmungrkrxtr. X nzkatxpxlr nide mz nzaclvekr Gct nide, mz nzaprc-krbzlr nide mz mq Setzn, murde natekqtrle nqmq nr drtwrde mz nzplzpxkrde alwx ngrde.

natqngeng mz nzayrplapx-krmu nide. X sc tqkrlzpepx kx sa navz-nqblq-kzamu natqngeng mz nzipq-krmu nide. X mz nzipq-krmu nide, ipq-kzx nide. Kxnmcpix krlzle kx ipqpex nide mz nzatrkatikrde ninge, murde ma tqrpwa'ngrne nzaodu-mou-krmu nide. ¹¹ Mrlz nzalekrgu da lc, murde ma tqkabzku mz Setzn zmatq ngr nzatrkatikrde nigu murde pxtxpx-ngrgu nzipq-krgu mzlegu lc. Krlz-zpwsku kx Setzn vz zvz nzyrlq-krde drtwr ngr nzatrkatikrde nigu kxnzrlxngiting. †

¹² Atwzlr-ngrbo Taetus mz nzka-krbzle letz scnge bamu. X kzdung mzli mz nibrde, rlaszx taon kc Efiszsz mz nzvz-krnge mztea Troas mz nzyapwxtipx-krbo Nrpakxmrlz badr, murde narmctix Taetus mrlcde mz nyzylu-krmle bange. ☆ Mzli kc tqkrlz-ngrbo mrlc, kxmule-esz' leplz lcng nasuti drtwrdr nzxlr-krdr Nrpa ngr Jiszsz, ¹³ a' sc tqkx zlwz mz drtqng nimu, murde Taetus trkrlzkaple Troas. X mzli kxpipzne mnckr badr kxnzrlxngiti-ateng kcng mrlc, x sc tqrlaszpepx nidr. X sc tqvzpepx Masedonia provins mz nzmcti-krnge Taetus.

Kxnzrlxngiting Nzaovxio-zvzlr Setzn Mz Nzaxvctr-krbzlr Mz Kxnmcpix ‡

† **2:11** Kzdung mzli zyagox prtzbzle mz doa kx pxtxpx-ngrde nzipq-krde leplz. ☆ **2:12** Aposol 16:8 ‡ **2:13** Mz 2 Korint 7:5 Pol ycmnetr-mou-ngrde nzvz-krde Masedonia Provins x nzmcti-krde Taetus. A' mz ngalrde lcng dcpix mz drtwrde kx kxmule-esz' kxne drtqde Taetus, a' Setzn trpnzng nratrkati-krde nide. X Pol abrtzlvzle nzaovxio-krde Setzn. Murde kxmule-esz' trxplrkuu, a' zmatq ngr Gct mz zmrlz ngrde kxmyalz okatrl nigu mz nzaovxio-krgu Setzn x alwx.

14 Sa naycmnetr-mou-ngrne da lc mz nibrde. A' mzli ka awi-ngrbo mz Gct kx kxmule-esz' da kx prtzm bange, a' aovxiox Setzn mz nzaxvctrkrbo mz Kxnmcpx kc tqaovxiopete nide. X Gct okatrle ninge mz nzyapwxtipx-krnge Nrpa ngr Kxnmcpx drlve keng vzkix. X Nrpakxmrlz lc apule zskapu ngr bqlr nc ninz kx mnrtte mrlz zlwz kc tqlvabqtile mrkang kqlu. 15-16 Mz drtwr Gct mnrtte mrlz zlwz, murde abrtzlvzle nzyapwxtipx-krnge nrpa lc. X mz drtwr leplz kcng sa narlapxng, mnrtq nrpa lc mrlz zlwz kz mz nzxlr-krdrle, murde mailzle nidr mz nzlungr kxboi. A' leplz kcng sa naprtrng mz Hxl, nzpxtxpx-ngrdr nzxlr-krdr Nrpa ngr Jiszs, murde mz drtwrdr nrpa lc brtu apule namz kxmibi. X mz nzpxtxpx-krdr nrpa ngr nzlungr, nzprtrng mz nzbz-alongr. Trpnzng kx takitrde nzyapwxtipx-krde nrpa lc mz nzxplr-krde esz'-krde. 17 Kzdung ncblo nzyapwxtipxlr nrpa ngr Gct, murde nartwz-ngrdr da kx nakabz leplz kcng tzabrtz-ngrdr nzalvztr-krdrng. A' nigr badr kztengeng trapukru nidr, murde nzryapwxkrgr trnartwz-ngrgru da kx nakamamu. A' mz nzwztr-krbzkr mz Jiszs Kxnmcpx, krlzkr kx Gct obqom bagr, x yapwxtipx-zpwxkr nrpa kc tqaprcmle bagr.

3

Pol Nide Angidr Aposol Murde Nqm q Kr Lr Korint Mrlz

1 Bzkq rpiamu kx glqpx-lzbq-ngrne nzym-nengr lc. Trapukru kxnzetung kcng tzrtwz-zvzm letz murde suti drtwrdr kx leplz nakrlzlr kx

nzalvztr-krdrng tubq. Murde krlzpeamu nigr x nzwz-krgr. X tr-rlxti-kzpwzkru bamu nzryr-krmu letz mz nzokatr-krmu nigr. ²⁻³ Murde nimu esz'-krmu apuamu letz kx yr Kxnmcpx mz nzaelwapx-krbzle mz leplz kx wztrpzkr mz Gct. Murde trmrbrtru mz drtwrgr kx mzli kc tqyapwxtipx-ngrbzkr Nrpakxmrlz bamu, Jiszs tekqtrle nabzmu. X alele da lc mz nzwzkr Mqngrkxtr kc tqatwzlr-ngrm Gct kxlu zvz. X opx-angidrbrz mz leplz amrlx kcng tzkrlzlr nimu, kx atwzlr-kz-ngrm Gct nigr x nzalvztr-krgr tubq. Murde trapuwamuu letz kc tzlztr mz rplz, a' apuamu letz kxlu, murde nqm q nr nabzmu x nzmnc-krmu tubq. ☆ ⁴ Nzycmne-krbo kxmule lc murde brti drtwrgr kx Gct wz mz nabzmu mz nzaxvctr-krbzmu mz Kxnmcpx.

⁵ Krlz-angidrkr kx trpnzngr scgr zmatq esz'-krgr mz nztekqtr-krgr nabz leplz. A' zmatq ngr Gct txpwz kx tekqtrle nabzdr mz nzvzpx-krmle mz nzwz-krgr. ⁶ Murde nide kc tqokatrle nigr mz nzyapwxtipx-krbzkr nrpa ngr Nzesz'tikr Drtwr Gct Kc Ate badr leplz kcng tqarlapxpele, mz nzabrtr-krbzlr drtwrdr mz Jiszs Kxnmcpx. Mz Nzesz'tikr Drtwr Kc Kai tqyrlqle mz Lou sc Mosis, leplz nanibqng mz nzxpqbrlr-krdr lou lcng. A' mz Nzesz'tikr Drtwr lc Tqate, leplz nalung mz zmatq ngr Mqngrkxtr.

*Nzesz'tikr Drtwr Gct Kc Ate Myaszpx-zlwzle
Krk Kai Mz Lou Sc Mosis*

☆ **3:2-3** Jeremaea 31:33; Esikel 11:19-20; 36:26-27

⁷ Krlzku kx lou lc mrlz tqrpile kx leplz kxn-zaleng alwx nabzng. Murde mzli kc Gct tqka-ngrbzle Loukxtr mz Mosis nzlztrng mz rplz kx nzmelxng, zluli r Gct sc tqayzlrpxpe-ngrde mz Mosis. A' lr Israel nzmwxlrtilr zmatq lc x nzpctxpx-ngrdr nzobq-krbzlr mz mzte. Delc tqakqlvztrngr Mosis mzte mz lrpz. A' zyzlr ngr mzte lc krlzle nzvzneo-krde. ⁸ Delc, opx angidr kx nzmrlzkr Nzesz'tikr Drtwr Kc Ate tqyrlq Gct mz nzka-krbzle Mqngrkxtr mz leplz, myapx-zlwzbz mz Nzesz'tikr Drtwr Kc Kai. Murde mz Krkc Kai ayzlr-ngrbzle mz Mosis, a' mz Krlc Tqate prtrku mz zluli r Gct. ⁹ X krlz-kzku kx Lou sc Mosis lc mrlz tqaelwapx-ngrbzle mz leplz kx takitrde Gct nzayrplapx-krde nidr. X opx angidr kz kx nzmrlzkr Nzesz'tikr Drtwr Kc Ate myapx-esz'ngr murde Jiszs atubqtile leplz kxnzlxngitilr nide mz nzobqkr Gct. ¹⁰ X mzli ka, nzmü na-arsakrlr-ngrgu nzmrlzkr Nzesz'tikr Drtwr Kc Ate mz Lou sc Mosis, opxm kx Lou lc trpengr nzmrlz-krde, murde Krkc Tqate mrlz-esz'ngr. ¹¹ X mou, krlz-kzku kx Lou lc mrlz, kxmule-esz' nayrkrpxpe. X opx angidr kz kx nzmrlzkr Nzesz'tikr Drtwr Kc Ate, myatxpx-zlwzbz mz Krkc Kai, murde yc alo.

¹² Mz nzmü-krde lcde, nelzgr br mz nzryapwx-pxngr, murde krlzkr kx nrpa scgr lc tqyc zvz, a' nrpa sc Mosis nayrkrpxpe. ¹³ A' trapukru Mosis kc tqakqlvzle nyzlrxpxkr mzte, murde lr Israel ma tzmclr nzvzneo-krde. ¹⁴⁻¹⁶ Mzli lcde, batrpz Gct nzmqngikr nardr, x nardr trpnzngn nzyrplatitr-krdr drtwr ngr natqdeng, krlzmle mzli ka. Murde mzli kc lr Jiu tzrlwx-

ngrdr Nzesz'tikr Drtwr Kc Kai mz Nzryrngrkxtr Kc Kai, trtwzlru drtwr ngrde, murde kzdq kc da akamrbr-ngrbzle nzaokrdr drtwrdr, da kc tqwaibzle mz kxtrngiulrjiu. A' mzli kc leplz tzabrtr-ngrbzlr drtwrdr mz Kxetu Jiszs, Mqngrkxtr okatrlle nidr mz nzrkatz-krde da kx akamrbr-ngrbzle nzaokrdr drtwrdr. ¹⁷ Murde tqngi Mqngr Kxetu rgu kc tqwz mz nzbzgu. X Mqngrkxtr lc aopxbzle drtqgu murde trnamn-clzpepwwzkuu mz zmatq ngr Lou sc Mosis x alwx. ¹⁸ X mzli ka, nigu amrlx kcng tzrlxngiting krlzku nzmrlzkr nqm q kr Kxetu Jiszs, murde trpengr da kx akamrbr-ngrbzle nqm nr drtwrgu. X mz nzaotikr drtwrgu Kxnzmpx, Nzryrngrkxtr apule dzpq, kc tqaelwapx-ngrmle mqngrde bagu. X Mqngrkxtr tekqtr-ebir-ngrde nigu, mz nzapukrgu Jiszs. X nzaelwapx-krku nzmrlzkr nqm krde sc tqetunepx vz.

4

Nqm Krgu Nzaelwapx-ngrdr Kx Gct Mncpxm Bagu

¹ Trpnzngr nztalvzokr nabzgr mz nzyapwxtipx-krgr Nrpakxmrly, murde Gct yc vz mz drtwrde nigr x okatrlle nigr. ² X nqm krgr tubq mz da amrlz murde yrlqpx-lzbqgr mz da kx myangr drtq. X da amrlx kx alekr takitrde leplz nzmc-krdrlyng. Tresabrtikru leplz murde nalalztqmng bagr o naokatrlr nigr. X trpnzngr nztekqtr-krgr nrpa ngr Gct. A' yapwxtipx-zpwxkr nrpa angidr, murde krlzkr kx Gct sa tqobqom bagr. X krlz-kzkr kx leplz kxnztubqng

sa namclr kx nzalvztr-krgrng tubq. ³⁻⁴ A' mzli lcpwz, Setzn, kc tqaclvele nrlc, ayrputrpzle drtwr kzdung leplz, murde ma tztwzlr drtwr ngr Nrpakxmrlz. Leplz lcng sa naprtrng mz Hxl, murde trnzkrzlru kx Jiszs Kxnmcpx myapx-esz'ngr mz nzaotr-angidr-krde Gct. ⁵ X Jiszs Kxnmcpx lc tqyapwxtipxkr mz nzngini-krde Kxetu kc tqaclve-zvzle leplz amrlx. A' trycmnetr-ngrgru nigr esz'-krgr, a' ngi txpwz mz nzrpi-krgr kx kqle Jiszs nigr mz nzwztr-krbzkcr bamu. ⁶ Mzli kc tqwzng Gct nrlc, rpile kx, "Zyylr nayzlrpx-ngrm mz nzlo." ☆ Mz nqmq lcpwz, Gct katxde da kx akamrbr-ngrbzle nqmq nr drtwrgu, mz nzayzlrpx-krmle nzalvztrngr angidr mz drtwrgu, murde nargu nayrplatitrlr drtwr ngr nrpa ngrde. X mzli ka mz nzkrzpe-krgru Jiszs Kxnmcpx x nqmq krdeng, nakrlz-kzku kx nqmq kr Gct mrlz-esz'ngr.

⁷ Krlzkr nzmrlzkr nqmq kr Kxetu Jiszs x nzyapwxtipx-krgr da lc ngi da kxbrngz-esz'ngr. X kxmule-esz' nigr leplz txneng x nrkrdrdqgr yangrnge, mz nzapu-krdr dis kx mrglc ani, a' Gct aprcmle nzwzng lc bagr. Alele da lc mz nzaelwapx-krde kx zmatq ngr Nrpa ngr Jiszs mz nztekqtr-krde leplz, trvzpxpuu mz zmatq ngrgr esz'-krgr mz nzyapwxtipx-krgrle, a' vzpxm mz Gct. ⁸ Dekc nzxpxngr kxkqlu tqprt-z-ngrmlr bagr, a' trnzaovxiolru nigr. X nzwrd kqlu kx nabzgr talvzo-ngrdeng, a' drtwrg trmau. ⁹ Nzaetq zvz drtqgr, a' Gct mnc-zvzm bagr. Nzwrd kqlu kx nztz-ngrgr, a' trbzku. ¹⁰ Drive keng vzkikr, prtrkr mz nzatrkatigr kcng pwz

☆ 4:6 Nou 1:3

tqprtbz mz Jiszs. X rlrpx-lzbqgr mz nzbz-krgr, da kc tqwaile, murde leplz nakrlzlr kx zmatq kcpwz tqalu-moule Jiszs, dekc tqwz mz nabzgr x nrkrdrtqgr. ✧ ¹¹ Mz nzwztr-krbzkr mz Jiszs mz nzlu-krgr, Gct sc tqrlr-ngrmle bagr nzprtr-krdr mz da kxkqlu kx nabatrpzle nzbz-krgr. Murde suti drtwrde kx leplz nakrlzlr kx Jiszs lupe mou x zmatq ngrde dekc tqwz mz nrkrdrtqgr kxyan-grnga mz nzokatr-krde nigr mz nztu-amqngi-krgr kxmule-esz' da kx prtz. ¹² Delc tqrlrpx-lzbq-ngrgr mz nzbzngr murde naprtramu mz nzlungr kxboi.

¹³ Apukr ncblo kc tqrpile kx, "*Pipxx murde abtrpo drtwrge mz Yawe.*" ✧ Murde pipx-zvz-kzkr nrpa ngrde mz nzabrtr-krbzkr drtwrgr bade. ¹⁴ X krlzkr kx nide kc tqatulz-mople Kxetu Jiszs mz nzbzngr. X kxmule-esz' nznibqgr, a' mz nzaxvctr-krbzku mz Jiszs, sa na-atulz-kz-mople nigu mz nzlungr kxboi, x sa navzmile nigu mz nzmncr-krbzku bade Heven. ¹⁵ Da lcng amrlx tzprtzmqng bagr ngi dalr nzokatrngr nimu x leplz kc-kzng tqalvztrkr. Murde mz nzkqlunepxkr leplz kcng tzlxngitilr nzmrlzkr Nrpa ngr Jiszs, nzawi-krbzlr mz Gct x nzangio-krdr nide naetunepx kz.

¹⁶ Delc nabzgr trtalvzou mz nzwztr-krbzkr mz Gct. Murde kxmule-esz' nrkrdrtqgu vztrpem, a' Gct sc tqaxplr-zvzle nabzgu mz zbq kang kqlu. ¹⁷ Mz nzobqtix-krgru nzetukr da kxmrlzting amrlx kx natwz-aloku Heven, nzaetq-krmlr drtqgu

✧ **4:10** Matiu 16:24-25; Mak 8:34-35; Luk 9:23-24; Rom 8:17; 2 Korint 1:5; Filipae 3:10; 1 Pita 4:13 ✧ **4:13** Sam 116:10

mz nrlc ka topwz, x mzli rde mrbcnepwz. ¹⁸ Mz nzmukrde lcde, traotiu drtwrgr da kx prtzm mz nrlc ka, murde sa naykrpxng. A' aoti txpwz drtwrgr da kx naprtzm Heven murde sa naye-along.

5

¹ Nrkrdrdqgu mz nrlc ka nzapulr matelq, murde sa nabzng. A' krlzku kx Gct sa nakamople bagu nrkrdrdqgu Heven kx na-apulr ma kx tu-amngi murde trnzbzung. ² X mz nzmnc-krgru mz mzli nzkxpungr mz nrlc ka, batrple bagu nzsuti-zlwzkr drtwrgu nztwz-mou-krgru nrkrdrdq lcngr kx trpnzngr nzxpu-krdr. ³ Murde mz nzbzkr nrkrdrdqgu mz nrlc ka, mqngrgu sa narmctilr me namnc-ngrdr mzli kc natwzpe-mou-ngrgu nrkrdrdq lcngr. ⁴ A' mz nzmncbe-krgru mz nrkrdrdq lcngr tr-rblxu nzbz-krdr, yrnizvz-ngrgu zvetq. X mzli lcpwz, trsutiu drtwrgu nzbz-krgru, a' suti drtwrgu kx nrkrdrdqgu lcngr nalrtipxng mz nrkrdrdq kx tretqu, murde sa nalu-along. ⁵ Gct yrlq-pnzle drtwr kx sa nakamople bagu nrkrdrdq lcngr kalr. X batrple bagu nzsutikr drtwrgu nrkrdrdq lcngr. X amncpxmle Mqngrkxtr mz nabzgu nangi rkx kx sa na-atutrle nzesalz-krdeng.

⁶⁻⁷ Delc krlzku kx sa natwzku nrkrdrdq kzbleng lcngr kalr. X brti drtwrgu kx Gct sa na-atutrle nzesalz-krdeng amrlx, kxmule-esz' trmckaku. X trpnzngr nzprmitr-krgru nrkrdrdqgu lcngr tr-rblxu nzbz-krdr Heven. Mz nzmukrde lcde, obqtipxku

nzyrlqtxo-krgr nrkrdrtdq mz nrlc ka, mz nzvz-krbzku mz Kxetu Heven, kc tqngi mrnyzgu angidr.

⁸ X trmwxlrtikru nzbzngr, murde mz drtwrgr nzmnc-trkrbzku mz Kxetu Heven myaszpxle nzmnc-krgr mrka. ⁹ Kxmule-esz' mnckr mz nrkrdrtdq mz nrlc ka o yrlqtxokrng mz nzvztr-krgr Heven, a' da kx myapxbz mz drtwrgr nzaelalz-krmgr drtwr Kxetu mz da amrlx. ¹⁰ Murde mzli kc nigu amrlx kxnzrlxngiting natutr-ngrbzku mz mz Kxnzmcpx kalr, sa na-ayzlumle da bagu mz nzvz-nqblq-krde da kx alekung mz nrlc ka, kxmule-esz' mrlz o trka. *

¹¹ Mz nzmyatitr-krgr Gct, dekc tqabz-ngrgr nzngi-batr-krbzkr bamu nzkrlez-krmu kx nqm q krgr mrlz x takitrde nzmnc-lz-krmamu bange mz nzngini-krnge aposol x mz nzlxngiti-krmu nrpa angidr. Gct krlzle kx nqm q krgr mrlz x kqlele nigr mz nzwzngr lc. X lxngitix kx krlz-kzamu da lc mz nabzmu. ¹² Mz nzycmnengr lc trglqpx-lzbq-ngrgru. A' ngi dalr nzayzlu-krbzmu natq leplz kcng tzatrkatilr nqm q krgr, mz nzrpi-krbzmu badr kx abrtzlvzamu nigr. Murde leplz lcng nzglqpx-lzbqng mz da kx nzmc leplz, a' traotiu drtwrdr nqm q nr nabzdr. ¹³ Kxmule-esz' nzrpilr ngqngukr, a' nzngqngu-krgr ngi dalr nzaelalz-krmgr drtwr Gct, murde wztrpzkr bade. X mz nzrpi-angidr-krbzkr da bamu ngi dalr nzokatr-krgr nimu. ¹⁴ Murde nivz lr Kxnzmcpx

* **5:10** Kxnzrlxngiting kcng tzaleng da kxmrlz sa natwzlr da kxmrlzting, a' krkcng trnzaleung da kxmrlz trpnzngr da kx natwzlr, a' nangi txpwz nzlungr kxboi. [Sam 62:12]

mailzle nigr mz da amrlx kx alekr. Murde mz nivz lrde, bz-ngrde leplz amrlx. Delc nigu leplz nedeng prtrku mz nzbz-krde. ✧ 15 X mz nzbz-krde leplz amrlx, atulz-mop Gct nide mz nzbzngr. Murde suti drtwr Gct kx leplz kcng tzprtrng mz nzlungr kxboi mz nzlxngiti-krdr Jiszs bzkq nzvz-nqblqpelr me pnz drtwrdr esz'-krdr, a' navz-nqblq-alzulr me pnz drtwrde.

16 Mz nzm-krde lcde, mzli ka nzaolvz-krgr leplz trpengr nzvz-nqblq-krde drtwr kxtrnzr-lxngitiung, a' nzaolvz-krgr nidr navz-nqblqle drtwr Kxnzmcp. Mzli kc tr-rlxngitika-nggr, aolvzkr Kraes mz nzvz-nqblq-krde drtwr kxtrnzrlxngitiung. A' mzli ka krlz-angidrpekr nide. 17 Leplz amrlx kcng tzabrtrpzlr drtwrdr mz Kxnzmcp nztekqtr-atwrnrpe-ngrng. Murde Gct tekqtrle nqm q krdrng kxblzlongr kxtrka mz nqm q kzbleng kxmrlz. 18-19 Sc tqale Gct da lc, murde Jiszs Kxnzmcp bz-ngrde nigu badr leplz amrlx mz nrlc. X dekc tqyzlumi-mop Gct nigu mz nzmnc-zpwx-krgr badr. X aprcmle bagr nzwzng m nzyapwxtipx-krbzkr da lc. Rpibzkr badr kx Gct sa tqipqpx-zvzle alwx ngr krkcng tzplzpxbzlr alwx ngrdr bade mz nzabrtr-krbzlr drtwrdr mz Kxnzmcp kc tqbz-ngrde nidr. Murde Gct suti drtwrde namnc-zpwx-moung badr.

20 X nigr menrpa neng Kxnzmcp murde pipxbzkr natqdeng mz leplz. Apule Gct yrnititripzle bamu, mz nzrpi-krbzkr bamu kx, "Natekq-tramu nqm q nr drtwrmu, murde namnc-zpwx-

✧ 5:14 Galesia 2:20; 1 Timoti 2:6; 4:10; Rom 6:3-11

mouamu badr mz nrwx.” ²¹ Kraes tubq murde trpnzngr alwx ngrde. ✧ A' Gct rlr-ngrbzle bade nzayrplapxngr nide mz nzxpe-krde alwx rgung amrlx, murde natubq-kzku mz nzobqkr Gct mz nzaxvctr-lzbq-krbzku mz Kraes. ✧

6

¹ Prtrpeamu mz zmrlz ngr Gct kxmyalz mz nzarlapx-krde lc nimu. X mz nzwz-lxblr-krgr badr Gct, rngidrlvz-ngrbzkr bamu kx bzq ma mz drtwrmu zmrlz lc, a' rlr-ngrbzmu bade nzokatr-krde nimu nzrvz-nqblqngr nide. ² Rpi pnz Gct mz Nzryrngrkxtr kx, *“Mz mzli kx mrlzm bange, sa na-ayzlu-ngrbo da kx rlxtimamu bange, murde naokatrix nimu mz mzli r nzarlapxngr.”* ✧ Nakrlzamu kx mzli ka, mzli kx mrlzpebz mz Gct mz nzarlapx-krde leplz, murde sc tqatwzlrpe-ngrmle Mevalu Kxnmcpz mz nrcl, x suti drtwrde kx na-abrtrpzmu drtwrmu bade mzli ka.

Nqm q Kr Leplz Kcng Tzwztrpzng Mz Gct

³ Nigr badr kztengeng trpnzngr nzale-krgr da kx nabatrpxle mz leplz nzpxtpx-krdr nzxlr-krdr Nrpakxmrlz. ⁴ X aelwapx-ngrgr kx wztr-angidrbzkr mz Gct, murde tu-amqngikr mzli kc tqprtr-ngrgr mz nzaetqngr drtqgr, nzkxpu-krgr, nzvztx-zlwzkr drtwrgr, ⁵ nziklatingr nigr, nzadwatrngr nigr mz presin, x nztutilz-lzbqkr zbo ngr leplz kcng tzmaneutng nigr murde nanibqlr nigr. X vz zvbz nzbtrtkr drtwrgr Gct mzli

✧ **5:21** Hibru 4:15; 7:26; 1 Pita 2:22; 1 Jon 3:5 ✧ **5:21** Asaea 53:6; Rom 3:21-26 ✧ **6:2** Asaea 49:8

kc tqwz-kato-zvz-ngrgr; trmwikru, x nelzgr brtale zvz. ⁶ Suti drtwrgr kx Gct na-abrtzlvzle nigr mz da amrlx. Mz nzmukrde lcde, nzmnc-krgr tubq, krlzkr nzmrlzkr nqm̄q krdeng, x drtwrgr trngya-anipwzu mz leplz, a' okatrkr nidr mz nivz angidr mz zmatq ngr Mqngkrxtr. ⁷ Alvztr-ngrgr Nrpa ngr Kxnzmcp̄x mz zmatq ngr Gct x mz natq angidrng. X nztubq-krgr apule toki r vea mz m̄qgrng. Murde rblxbz mz leplz nzatrkatikrdr Nrpakxmrlz mz nzpipx-krdr kx nqm̄q krgr trka. X krlzkr nzaovxiongr leplz amrlx kcng tzrpilr narpwa'-ngrdr nzvzpxkr Nrpa lc. ⁸ Wztr-angidrbzkr mz Gct kxmule-esz' nzglq̄px leplz nigr o nzp̄txpx-ngrdr nigr, kxmule-esz' nzabrtzlvzlr nigr o nzpibq̄tilr nigr, x kxmule-esz' nzrpilr nigr kxnzpokiāng, a' yapwxti-zvzkr da angidr. ⁹ Kzdung leplz nzkr̄lzlr kx wztrpzkr mz Gct, a' kzdu-kzng leplz nzp̄txpx-ngrdr nigr. Nzayrplatipxl̄r nigr x nzrpilr nanibq̄tilr nigr, a' trbzkr. ¹⁰ Nzavztibzlr drtwrgr, a' drtwrgr elalz-ngrmle Kxetu rgr. Kxmule-esz' trpnznḡr scgr da, a' prtr-kzkr mz da kxmrlzting amrlx kx kam Gct bagr mz nzaxvctr-krbzkr mz Kxnzmcp̄x. X okatrkr leplz mz nzprtr-kz-krbzlr bade.

¹¹ Mzlengeng x inwengeng lr Korint, aelwapx-ngrbzkr bamu kx mrlzti-zlwzkr nimu x trpnznḡr da kx yrlq̄-kapq̄bzkr bamu mz nzpipx-krbzkr bamu nivz kx yc mz nabzgr. ¹² X trpnznḡr me lolvz-moukr mz nivz lc. A' trka-atwrnr-ngrpwa'muu nabzmu bagr, mz nzmrlzti-kz-krmu nigr. ¹³ Apuamu doa nengeng. X pibo da lc mz nzapu-krbo bamu trtemu. Takitxtrde nzayzlu-kz-krpwzmu nivz lc bange.

Bzkq Axvctr-lzbqbmz Mz Kxtrnzrlxngitiung

¹⁴ Bzkq axvctr-lzbqbmz mz kxtrnzrlxngitiung, mz nzmnczl-krbmz badr mz nzwzngro mz nzyrlz-krbmz badr, murde ma tqprtrkzamu mz alwx ngrdrng. Murde leplz kxztubqng kcng tzvz-nqblqlr nqm q kr Gct trtakitrdeu nzaxvctr-lzbq-krbzlr mz kxdrka'ngrng kcng tzvz-nqblqlr nqm q kr Setzn. Da kc tqwai zyzlr x nzlo trnzkrzlru nzyctr-lxblr-krdr me esz'. ¹⁵ Trpnzngro nzesz'tikr drtwr mz Kxnmcp x Setzn. Mz nzmu-krde lcde, trpnz-kzngro nzesz'tikr drtwr kxnzrlxngiting badr kxtrnzrlxngitiung mz da kxtubq. ¹⁶ ?Myx kxmule, takitrde mqngro drka' kxnlz nztupx-krmleng Mangr-nzangiongro Yawe? Bzkqtx pnz! Mz nqm q lcpwz, trtakitrdeu nigu kxnzrlxngiting nzaxvctr-lzbq-krbzku mz kxtrnzrlxngitiung. Murde nigu Mrkc Tqtr nyz Gct mz nzmncpx-krmlle elr. Rpile mz Nzryrngkxtr kx, "Sa namncpxmc mz leplz nengeng x mz mzlirdr. Sa nangingibo Gct rdr, x nangingidr leplz nengeng." ✧ ¹⁷ Dekc tqrpi-kzle kx, "Prsrpxamu kxdrka'ngr lcng, x akipx-lzbqmu badr, murde ma tqbatrpzle trnztakitr-krdeu nimu mz nzprtr-krmu mz nzangiongro. ✧ Aleamu da lc x sa na-abrtzlvzx nimu." ✧ ¹⁸ X rpi kz Yawe kc tqrninr kx, "Sa nangingibo Trtemu, x nangingimu mrlxngeng x inyxngeng." ✧

7

¹ Mzlengeng x inwengeng, mz nzaotikr

✧ **6:16** Livae 26:12; Jeremaea 32:38; Esikel 37:27 ✧ **6:17** Asea 52:11 ✧ **6:17** Esikel 20:34 ✧ **6:18** 2 Samwel 7:14; 1 Be Ngrdr 17:13; Hosia 1:10; Jon 1:12

drtwrgu da lcng tqesalz-ngrmle bagu, naesakipe nzale-krgru alwx amrlx, kxmule-esz' mz nrkrdrtqgu o mz nzaokrgu drtwrgu. X mz nzmyatitr-krgru Gct, nztubqkr nzmnc-krgru naetunepx zvz.

² X yrnititropo bamu nzayzlu-kz-krmamu bagr mz nivz lrmu. Murde trpnznggr nimu kx atrkatikr, trpnznggr nimu kx alvztr-rbrkr, x trpnznggr nimu kx esabrtikr mz nztwz-krgr dztu-drng. ³ Trycmne-ngrpou lc murde na-amyatibo drtqmu. A' da kc tqwai nzpi-krbole bamu mzli kc, kx nzmrlzti-krgr nimu sa navz zvz, kxmule-esz' bzku o luku. ⁴ Pipxpebo da kx yc mz nabzngge, murde brti drtwrnge nimu. X glqpx-lzbq-ngrne nimu mz nzvz-nqblq-krmu Kxetu. X apqtrple drtwrnge mz nzpi-krm Taetus bange kx vz-nqblq-angidramu natqngeng mz letz kc kai. Abrtzlvzx nimu, kxmule-esz' prtizle nigr nzxpunggr kxkqlu.

Nzrlwakr Taetus Lr Korint Kxnzrlxngiting

⁵ Mz nibr nzkriz-krbzkr provins kc Masedonia, trmnc-zpwxkru murde tr-rmctikru Taetus mz nzyzlu-krmle bange. Mzli lcde nabzgr talv-zotx zlwz, murde rmctikr nzxpunggr mrkang kqlu, x mrlcdeng amrlx leplz otabrkr badr mz nzymnenggr. X mwxl-krgr drtwrgr nzlitr-krbzle mz Taetus mz nzatrkangr nide, x kx kz mz drtqgr kxnamu nzayzlu-krmamu letz scnge. ⁶ A' mz nibrde, Gct kc tqapqtrpzle drtwr leplz kx nabzdr talvzo, apqtr-kzple drtwrgr mz nzvz-krm Taetus. ⁷ X Taetus aelalz-zlwzmlle

drtwrgr mz nzrpi-krmle bagr kxmu nzapqtr-krbzmu drtwrde. Murde rpimle bagr kx sutitx zlwz drtwrmu nzoklati-krbo nimu, x drtwrmu vztx-ngrde kxmusrnamu ninge mzli kc, x mzli ka vqti drtqmu nzmnc-lz-krmamu bange mz nzngini-krnge aposol ngrmu.

8-12 X mzli ka abrtz-ngrne nzyr-krbo letz lc, murde atutrle me pnz drtwrnge mz nzbatr-krbzle bamu nzkr-lz-krmu kx mrlzti-angidramu ninge x amatq-angidramu ninge. X okatrle nimu murde narmu nalvxpzbzle mz nzale-krmu da kxtubq. X atwzlr-kz-ngrpo letz lc mz nzatubqti-krnge ncblo kc tqvz-rbr x mz nzokatrngr leplz kcng tqatrkatile. Kxmule-esz' pnanati-zlwzx nimu mz letz lc, a' mz nzyr-krbole, drtwrnge vz murde krlzx kx sa na-avz-kzpzle drtwrmu. X nzvzkr drtwrmu lc, krlzle nzyrkrpx-krde mz da kxtrka o da kxmrlz. Murde mzli kc drtwr leplz tqvz-ngrde x aoti txpwz drtwrdr da kxtrka lcng x nzpxtpx-ngrdr nztekqtr-krdr nqm q nr drtwrdr; krlc da kx na-akipx-lzbq-ngrdr badr Gct x batrpzle nzvz-krdr mz nzbz-alongr mz Hxl. A' mzli kc nzvzkr drtwr leplz tqbatr-ngrbzle nzavzo-lzbq-krdr x nyzlu-krbzlr mz Gct, krlc da kx na-ayrkrpxle nzvzkr drtwrdr mz nztekqtr-krdr nqm q nr drtwrdr. X awi-ngrbo mz Gct kx mz nzvzkr drtwrmu, yzlutiamu nide x sc tqtekqtrpeamu nqm q nr drtwrmu. Murde da kxmrlz kxkqlu kx nzvzpxmqng elr. Aesakipeamu nzale-krmu da kxtrka. X drtqmu myape-ngrde nqm q lcng tqtrka. X amatqpeamu ninge mz nzngini-krnge aposol. X mzli ka sutitx zlwz drtwrmu nzmnc-lxblr-krgru. X sc tqrpwa'pe-

ngrbzmuz mz leplz nzpibqti-krdr ninge. X sc tqayrplapxpeamu ncblo lc tqvz-rbr. Da lcnq amrlx nzaelwapx-ngrdr kx drtqmu vq mz nzatubqti-lzbq-krmu mz nzvz-rbr-krmung. Mz nzmuz-krde lcde, drtwrnge trvzpeu mz nzyr-krnge letz lc, a' drtwrnge elalz-zlwzpem. Murde vztx-ngrpwz drtwrmu mzli mrbcne x letz lc batrpzle nzyzlu-krbzmuz mz Gct, a' trbatrpwzleu nzesablqti-krmu nide. ¹³ Da lcnq amrlx nzapqtrplr drtwrgr. X abrtz-zlwz-ngrgr nzabrtzkr Taetus mz nzoklati-krbzle nimu, murde nimu amrlx apqtrpzmu drtwrde mz nqm q krmu. ¹⁴ Mzli kc narkalzpe-ngrmle, pibo mz Taetus kx glqpx-lzbq-ngrne nimu, murde lxngiti-angidramu x vqti drtqmu nzwztr-krbzmuz mz Gct. X mzli kc tqkrlzpe-ngrbzle nimu, tramyatipwamuu drtqnge, a' mcle kx nike pibo bade da angidrtx, da kc tqwai mz da kcng amrlx tqpitibong bamu. ¹⁵ Nzmlrtztkr Taetus nimu etunepx mz nzaotikr drtwrde kx drtqmu vq mz nzmncz-krbzmuz mz zmatq ngrde x amatq-zlwzamu nide mz nzngi-krde menrpa nenge. ¹⁶ X mzli ka, abrtz-zlwzpepex murde drtwrnge brpe kx sa na-ale-zvzpeamu da kxtubq.

8

Nzataktingr Trau Mz Nzwzkr Lrmakxtr

¹⁻² Mzlengeng x inwengeng, suti drtwrgr nakrlzamu nqm q kr dzbe lrmakxtr kcng mz Masedonia Provins. Murde mz nzvz-nqblq-krde zmrlz ngr Gct kxmyalz, drtwrdr elalz-zlwzm mz nzrka-nrbalq-krdr da kxkqlu mz nzokatr-krdr kztegunq lr Jiu kcng Jerusalem kx trpnzng

scdr da. X nzalelr da lc kxmule-esz' nidr esz'-krdr trpnzngr scdr da x kxtrnzrlxngitiung nzaetq-zlwzbzle drtqdr. ³ Napi-zpwxbo bamu kx nzkapxlr da kxkqlung. X mzli ka nzmnc-xglenepwzlr da kxpipzne. Trpnzngr kx rpibz badr nzale-krdr da lc, a' pnzpe drtwrdr esz'-krdr. ⁴ X nzrlxtitx-zlwzmlr bagr nzrlr-krbzkzr nzprtr-krdr mz nzatakqtingr lc, murde naokatr-kzlr dzbe lrmakxtr kcng Jerusalem. ⁵ Mz drtwrgr nakatxpxpwzlr trau kxpipzne. A' sc tzmyaszpxpelr mrkc tqpnz drtwrgr. Murde mzli kc kai nzrlrpx-lzbqzbng mz Gct mz nzale-krdr me pnz drtwrde. X mz nibrde nzrlxtimlr bagr nzpi-krbzkzr badr nike na-alebzlr bade. X sc tzkapx-ateng trau kxkqlu.

⁶ X nZRka-nrbalq-krdr da adcpyle drtwrnge mz nimu x nqm q krmu. Delc tqrtultr-ngrbole mz Taetus mz nzyzlu-krbzle bamu mz nzokatr-krde nimu nzayrkrpx-krmu nzatakqtingr lc. Murde nide kc tqyzutrpzle nzwzngr lc bamu mz yiz kc tqvztxpe. ⁷ Sc tqwz-angidrpeamu mz zmatq kxkqlu mz nzwztr-krbzmu mz Gct. Murde wz-angidrpeamu mz zmatq ngr nzrlxngitingr, nZrplzpxngr nrpa kx kabz Gct, nZrpiPxngr nrpa ngr nZrkrlzngr, x drtqmu vq mz nzokatrngr. X mrlztiamu nigr mz nivz kc tqaelwapx-kaingrbzkr bamu. X mzli ka takitrde nzwz-angidr-kz-krmu mz zmatq ngr nZrka-nrbalq-ngrbz da mz leplz kx trpnzngr scdr da.

⁸ Krlc trngiu natq kx rngidrlvz-ngrbo bamu. A' suti drtwrnge kx drtqmu navq kz nZrka-nrbalq-krbzmu da mz leplz mz nZaelwapx-krmu kx mrlzti-angidramu nidr, da kc tzwaipe lr

Masedonia kxnrlngringitng. ⁹ Murde Kxetu rgu Jisz Kxnmcpax aelwapx-ngrbzle zmrlz ngrde kxmyalz bamu. Rlaszmle Heven mz nzngrini-krde bcnyr elr, mz nzngrini-alzu-krde kxtr-rngiscu mz nrlc, murde naprtr-kzamu mz da kxmrlzting sc Gct kcng tzvzpxmqng mz nzwz-krde kx etq-nrbalqngr drtq mrka.

¹⁰⁻¹¹ Mz yiz lc tqvztxpe nimu lr Korint yzutr-kaiamu nzatakqtingr trau lcngr. X drtqmu vq zlwz nzale-krmule. A' na-ayrkrpxamu nzatakqtingr lc mz nzrka-mou-krbzmu trau kznike ycpebz bamu mzli ka. Murde nzvqtikr drtqmu lc mz nzale-krmule navz zvz nakrlzbzle nzayrkrpx-krmule. Pibo da lc mz nzokatr-krnge nimu.

¹² Gct suti drtwrde kx navqti drtqmu nzrkapxngr da. X mz nzvqkr drtqmu lc, abrtzlvzle nzrkapx-krmu da, mz nzvz-nqblq-krde da kx ngiscmu, kxmule-esz' doa kx esz' kapxle da kqlu o pipz.

¹³ A' trsutiu drtwrnge nzkapx-krmu da kxkqlu x trpnz-alzungr kx nangi scmu. A' nimu amrlx narngisc-kzpu da kx natakitrde nzmnc-xgle-krmuleng. ¹⁴ X mzli ka mz nzngrisc-krmu da kxkqlu takitrde nzokatr-krmu kx trpnzngr scdr da. X mz kzdu mzli kx natakitrde, sa na-ayzlu-kzpzlr bamu. ¹⁵ Murde Nzryrngrkxtr mz nzymnetr-krde mz dakxnzng kx atwzlr-ngrm Gct lzke, rpile kx, *“Doa kx rtwz dakxnzng kxkqlu, bzqk ngi natxpwzle esz'-krde. Murde doa kx rtwz dakxnzng kxpipz, narngina kz dakxnzng kx namnc-xglele.”* ☆

¹⁶⁻¹⁷ Rtulrtr-ngrbzkr mz Taetus nzyzlu-mou-krbzle bamu. X angqlzlvzle drtwr lc, murde

☆ 8:15 Nzrlaszng 16:18

aotipe kz drtwrde nzale-krdele. X awi-ngrbo mz Gct nzbatr-krbzle nzvqtikr drtqde nzokatr-krde nimu mz nzatakqtingr lc, da kc tqwai nzsuti-kzkr drtwrge le. ¹⁸ Atwzlr-ngrbzkr Taetus x kzdq mzlegu kx nzamatq lr makxtr amrlx mz nzyapwxtipx-krde Nrpakxmrlz. ¹⁹ X nzmcpplr nide murde navznekr badr mzli kc natwz-ngrbzkr trau lcng mz lr Jerusalem. Alekr nzwzngr lc mz nzamatq-krgr Kxetu rgu x mz nzaelwapx-krbzkr mz lr Jerusalem kx suti drtwrgu nzokatr-krgr nidr.

²⁰ Alekr da amrlx mz nzatakqtingr lc, murde leplz ma tzipibqtilr nigr mz kxmu nzlolvz-krgr trau kxetu lc. ²¹ Murde suti drtwrgu nzale-krgr da kxtubq mz nzobqkr Gct x mz nzobqkr leplz.

²² X atwzlrmi-ngrbzkr ncblo lcng nzling kzdq kz mzlegu. Murde krlzkr kx nide ncblo kx brti drtwr nzwztr-angidr-krbzle mz Gct. X drtqde vq zlwwz nzokatr-krde nimu mz nzatakqtingr lc, murde Taetus pibzle bade nzmrlzkr nqm q krmu.

²³ Ncblo lcng brti drtwr mz nzlolvz-krdr trau scmu. Murde Taetus nide kztenge kx wz-lxblrkr ncdr mz nzokatr-krgr nimu. X kxnzaclveng dzbe lrmakxtr nzatwzlr-ngrbzlr mzlegu lcng nzling x leplz nzglqlzlr Kxnmcp x mz nzmrlzkr nqm q krdr. ²⁴ Mz nzm-krde lcde, aoduamu nidr murde dzbe lrmakxtr kcng tzatwzlr-ngrmlr nidr bamu nakrlz-angidrlr kx trpokiawxu mz nzglqpx-krnge nqm q krmu.

9

¹⁻² Krlzx kx abzo mz yiz kc tqvztxpe, vqti drtqmu nzprtr-krmu mz nzatakqtingr trau lc

mz nzokatrngr lr Jerusalem kxnrzlxngiting. X trpengr nzpi-krbo bamu kx da lc ngi da kx myapxbz. A' nakrlzamu kx glqpx-zlwzbo nimu mz lr Masedonia Provins. X mz nzxlr-krdr nzvqkr drtqmu mz nzatakqtingr trau lc, baprpzle badr nzvq-kzkr drtqdr nzprtr-kz-krdr elr. ³⁻⁵ Mz nzmukrde lcde, na-atwzlr-ngrbo mzlegu lcng tq bamu, mz nzatakqti-krbzlr bamu trau kc tqpiamu kx nakapxamu. Murde suti drtwrnge kx trau lcng nayc pnz kai mzli kc nakaputr-ngrbo bamu. Mrlz nzoliqti-angidr-krmule, murde ma tqmyangr drtqmu x drtqnge kz mz nzglqpx-krnge nimu, nzmukdzung lr Masedonia navzbzkr badr. A' mrlz nzoliqti-kai-krmule, murde ma tzrpi drtwrdr kx rtulrtr-ngrbo bamu nzkapx-krmule.

⁶ Murde nzrka-ngrbz da mz kx trpnzng scdr da apule nzpenger da mz nrlanc nyz Gct. X esalz-ngrmle bagu kx sa na-amrlzle doa kx alele da lc. X Nzryrngkxtr alvztr-ngrde nigu kx, "Doa kx pe dakxnzng kxpipezne, sa narkqtile da kxpipezne kz. A' krkcng tqpe dakxnzng kxkqlu, sa narkqti-kzle da kxkqlu." ✧ ⁷ Mz nzmukrde lcde, doa kxes' mz nimu, nakrka'-kai-ngrbzle mz Gct x nakapxle nike pnz drtwrde nakapxle. A' bzkq rkaxq murde mz drtwrm nzrtulrtr-ngrbz bam, murde ma tqavzbzle drtwrm. Murde Gct abrtzlvz-zlwzle doa kx rka-nrbalq da kx vzdz-angidrm mz nabzde. ⁸ X mz nzale-krmu da lc, Gct krlz-zvzle nzrka-nrbalq-krbzle da kxkqluting bamu, mz nzvz-nqblq-krde zmrlz ngrde kxmyalz-esz'ngr.

✧ **9:6** Nzryrplaxngr 11:18; 19:17; Hosia 10:12; Matiu 10:42; 25:34; Luk 6:38; Galesia 6:7

Murde sutitx drtwrde kx namnc-zpwx-zvzamu mz nzrtwz-krmu da amrlx kx takitrde nzmnc-xgle-krmuleng. X suti kz drtwrde kx nartwzamu da kx nzmyaszpxlr da lcng, murde naokatr-kzamu kx trpnzngr scdr da mz nzqqlukr dz-tumung. ✧ ⁹ Murde Nzryrngrkxtr ycmnetr-ngrde ncblo kx rka-nrbalq da mz nzrpi-krde kx, *“Tresakiu nzrka-krbzle da mz kxrsuti drtwr. Vz zvz nzayzlu-krbz Gct bade mz nqm q krde lc qtubq.”* ✧

¹⁰⁻¹¹ X rpi kz Nzryrngrkxtr kx, Gct rkam *“rtq da kx napeti. X rka-kzp dakxnzng kx nangq.”* ✧ Mz nzmu-krde lcde, nzrka-krbzle bamu da x nzrkrlzngr kxkqluting sa naetunepx zvz, murde nzokatr-nrbalq-krmu leplz naetunepx zvz kz. X trau kcng natwzbzkr mz lr Jerusalem, sa naba-trpzle badr nzawi-krbzlr mz Gct mz nzokatr-nrbalq-krmu nidr. ¹² Delc, da lcng li nzvzpxmqng mz nzokatr-krmu leplz kcng trpnzngr scdr da. Leplz lcng nzrtwzng da kx takitrde nzmnc-xgle-krdrle ng x nzawi-krbzlr mz Gct etunepx zvz. ¹³ X lr Jerusalem lcng, mz nzngini-krdr lr Jiu, sa naglqlzlr Gct murde nzokatr-nrbalq-krmu lc nidr, kxmule-esz' trnginipuu lr Jiu. X da lc aelwapx-zpwxzbzle badr kx lxngiti-angidramu Nrpakxmrlz x drtqmu vq mz nzvz-nqblq-krmu natq Jisz. ¹⁴ X sa nakrka'-ngrdr nimu mz nivz kxetu, murde Gct aelwapx-ngrbzle badr zmrlz ngrde kxmyalz mz nzokatr-krmu nidr. ¹⁵ X na-awi-kzpzku mz Gct mz nzka-nrbalq-krmle

✧ **9:8** Livae 25:35; Lou Kcpwz 15:7-11; Efisz 4:28; Filipae 4:19; 1 Timoti 6:6-10 ✧ **9:9** Sam 112:9 ✧ **9:10-11** Asaea 55:10

Mrlxde bagu, kxmule-esz' rblxm bagu nzrpi-krngu nzetukr zmrlz ngrde lc tqmyalz.

10

Pol Ayzlubzle Natq Leplz Kcng Tzpiqtilyr Nide

¹ Mzli ka, ninge Pol, sa na-ayzlubo natq leplz kcng tzpiqtilyr ninge, mz nzrpikr kzdung nimu kx trngini-angidrngeu aposol. Nzycmne-krdr kxmule lc murde pnanatix nimu mz letz scngeng, a' vz-nrwx-ngrbo bamu mzli kc tqmnc-ngrgu badr. A' mz nzvz-nqblq-krnge Kxnmcp, avzozlbq x vz-nrwx-ngrbo bamu, mz nzrlxti-krbo bamu kx bzkq pibqtipeamu ninge. ✧ ² Mzli kc navz-ngrmc bamu, trsutiu drtwrnge nzpnanati-mou-krnge nimu mz nzayrplapx-krnge nimu. A' mw x sa na-alebo da lc mz leplz kcng tzrpilr kx vz-nqblqkr drtwr leplz mz nrlc ka. ³ Kxmule-esz' mnckr mz nrlc, a' trotabl-nqblqkru nqm q kr lr nrlc mz nzotabl-krgr badr leplz kcng tzrpwa'-ngrmlr nzwz-krgr. ⁴ Murde zmatq ngr nzotakrgr trvzpxpuu mz natq leplz kxtrnzrlxngitiung mz nzesabrtingr leplz. A' plzpxkr natq angidr kx kam Gct bagr. X natqdeng nzrngiscng zmatq ngr nzodatingr nqm q nr drtwr kznikeng trngiu da angidr. Natq lcng xplr x nzkrzlzr nzbatrkrbzlr mz leplz nztekqtr-krdr nqm q nr drtwrdr. Murde nqm q nr drtwrdr lcng tzvz-rbrng npapulr lrpalc kx xplr kx nzawxongr mz zmatq ngr Gct. ⁵ Murde milxtxokr drtwr x nzymnengr amrlx kcng tzrpwa'-ngrbzlr mz leplz nzkrzlz-angidr-krdr Gct. X aovxiokr nqm q nr drtwr lcng

✧ **10:1** Sekaraea 9:9; Matiu 5:5; 11:29

amrlx tzvz-rbrng, murde nzaotikr drtwr leplz da navz-nqblq-tpwzle me pnz drtwr Kxnmcpx. ⁶ X mzli kc navz-ngrmgr bamu x namc-ngrbzkr krkcng nzmncalzpebzng mz Kxnmcpx, sa na-ayrplapx-atekr nimu kcng tzxpqbrlr-ngrdr nide mz nzpxtpx-krmu nzmncalz-krmamu bagr.

⁷ Leplz kcng tzpibqtilr nigr nzrpilr kx nidr leplz neng Kxnmcpx. A' nakrlz-angidramu x leplz lcng nakrlz-kzlr kx nigr kz leplz nedeng. ⁸ Drtqngc trmyau mz nzglqpx-lzbq-krgr mz zmatq kc tqkaom Kxetu rgu bagr. Murde zmatq lc ngi dalr nzokatr-krgr nimu mz nztu-amqngi-krmu mz nzrlxngiti-krmu, a' trngiu dalr nzatrkatingr nimu. ⁹ Dekc trsutiu drtwrngc nzmwxlrtri-krmu ninge mz natq kcng tqyrbo bamu mz letz scngeng. ¹⁰ Krlzx kx kzdung nimu nzrpilr kx, "Nzycmnekr Pol mz letz scdeng matq-esz'ngr. A' mzli kcng tqmnc-ngrgu badr apunede ncblo kxmane x nzycmne-krde trxplru." ¹¹ A' rngidrlvz-ngrbo mz leplz lcng, kx mzli kc namnc-ngrgu badr, sa na-atutr-angidrkr natq amrlx kcng tqyrbzkr mz letz scgrng, mz nzaelwapx-krbzkr bamu kx rngiscgr zmatq.

¹² Trmrlzu nzrpi-krgr kx apukr leplz lcng. Murde nzrpilr kx nidr leplz kxntzubbng x nzmyapxbzng mz kzdung kz kxnzetung. A' mz nzaotikr drtwrdr nike tubq x myapxbz, nzobqtitxtrpwzlr nidr esz'-krdr. Krlc aelwapx-ngrde kx nzngqngu-angidrng. ¹³ A' trapukru nidr. Murde glqpx-lzbqtx-ngrpwzkr zmatq kc tqkaom Gct bagr. X nimu amrlx ngrmu mnclzmamu bagr mz zmatq lc. ¹⁴ Nzmu

trnayapwxtipxpwzkru Nrpakxmrlz bamu, vz-rbrkr mz nzrpi-krgr kx namnclzmamu mz zmatq ngrgr. A' ryapwpx-ayrnr-ngrbzkr Nrpakxmrlz bamu. X rngiscgr zmatq ngr nzngini-krgr aposol kcng tqmncclzbzmu badr. X krkcng tzvzmqng mz nibrgr trnzrngiscung zmatq lc. ¹⁵ Trglqpx-lzbq-ngrgru nzwzng kx nzale kz-dung kz leplz, da kc twailr. A' obqtipxkr mzli kc nabrpengr nzrlxngiti-krmu, murde mzli lc nakrlzamu nzokatr-krmu nigr mz nzvzpx-krgr mrkang kqlu mz nzyapwxtipx-mou-krgr Nrpakxmrlz. ¹⁶ Murde suti drtwrgr nzyapwxtipx-krbzkrle mz leplz kcng trnzxlrkalr Nrpa lc. X dekc krlzkr nzglqpx-lzbqtx-krpwzkr nzwz-krgr esz'-krgr, a' trngiu nzwzkr kzdu-kzng leplz.

¹⁷ X nzglqpx-lzbq-krgr mz nzwz-krgr lc, vz-nqblqle Nzryrngrkxtr kx rpile kx, *“Trtakitrdeu doa nzglqpx-lzbq-krde mz nike alele, a' naglqpx-tpwzle Yawe mz nike alele.”* ✧ ¹⁸ Murde kxnzglqpx-lzbqng esz'-krdr trabrtzlvzu Gct nidr, a' nide esz'-krde kx takitrde nzglqpx-krde leplz kcng tqabrtzlvzleng nidr.

11

¹ Mzlengeng x inwengeng, kxmule-esz' kr-lzamu kx takitpwzle Gct nzglqpx-krde doa, a' suti drtwrnge kx narlr-ngrmamu bange nzglqpx-lzbq-krnge mz nzymne-ngqngu-krnge, da kc tqwaipeamu. Murde ncblo lcng tqabrtzlvzamu mzli ka, trnginidru aposol angidr. ² X tubq nzdobulvz-krnge nimu, mz nzapu-krbo bamu trtemu kc tqyapwxtipx-ayrnr-ngrbo Nrpakxmrlz

✧ **10:17** Jeremaea 9:23-24

bamu. X suti drtwrnge kx nivz lrmu natubq mz nzmrlztitx-krpwzmu Jiszs Kxnzmcp, da kc tqwai trte olvi kx nayrlz suti drtwrde kx nqm q kr olvi lc natubq, mzli kc narlr-ngrbzle mz ncblo ngrde. Murde esalz-ngrbo mz Jiszs kx nanginimu leplz kxnztubqng. ✧ ³ A' mwxlrtix kx Setzn sa na-avz-rbrbzle drtwrmu x nabatrpzle bamu nzvecp-lybzq-krmamuz mz nzmrlztitx-krpwzmu Kxnzmcp, da kc tqwai pnz Setzn mz nzesabrti-krde Iv. ✧ ⁴ Murde lxngitiamu nrpa kx nzyapwxtip ncblo lcng, kxmule-esz' blepxbz mz Nrpakxmrlz kc tqyapwxtip-ayrnr-ngrbzkr bamu. X suti drtwrmu nztwz-krmu kxmnc mzlilxl kx trngiu Mqngkxtr.

⁵ Kxmule-esz' ncblo lcng nzrpilr kx nidr aposol kxnzmyapxbzng, a' mz drtwrnge trnzmyaszpxlru ninge. ⁶ X kxmule-esz' trkrlz-zpwxwxu kxmu nzymnengr, da kc tzwailr, a' krlzx nzalvztrngr angidrng. X aelwapx-ngrbzkr bamu zmatq ngr nzrkrlzng lc mz da kx pibzkrng bamu x aletikrng mz mzlirmu.

⁷ ?Nike tqrpiamu mz drtwrmu kx trmrlzu trnzrtwz-krngeu dztumung mz nzyapwxtip-krbo bamu Nrpakxmrlz? Murde apux Kraes mz nzavzo-lybzq-krnge murde naokatr nimu, a' rpiamu kx trtakitrdeu ninge. A' tratrkatiwxu nimu mz da lcng. ✧ ⁸ Murde mzli kc tqryapwpx-ngrbo bamu, rlr-ngrbo mz kzdung kz dzbe lrmakxtr nzokatr-krdr ninge mz trau. Murde nzkrllzr kx ninge trtedr mz Kxnzmcp. ?Myx

✧ **11:2** Matiu 22:1-2; Jon 3:29; Efszs 5:22-32; Nzaelwapxng 19:7-8; 21:2, 9 ✧ **11:3** Nou 3:1-6, 13 ✧ **11:7** 1 Korint 4:12; 9:3, 12, 15-19

kxmule, ncblo lcng tzipibqtilr ninge narpi-kzlr kx pnatibo dztu dzbe lrmakxtr lcng? ⁹ Kxmule-esz' kzdung mzli trpnzngr nange dakxnzng, a' tr-rlxpou da bamu. Murde mzli lcde, kzdung mzlegung kcng Masedonia Provins nzvzmqng x nzrkamqng bange trau kx namnc-xglex. X trpnzngr nztekqtr-krnge nqm q krnge lc. *

¹⁰ X pi-zvzbo da angidr bamu, da kc tqwai Kxnmcp. Murde tr-rlxpou da bamu, nimu lr Akaia Provins, murde ma tzrpi leplz kx pokia-ngrne nzglqpx-lzbq-krnge nzwztr-nrbalq-krbo bamu. ¹¹ Kzdung leplz nzrpibzlr bamu kx trnzrtwz-krngeu dztumung drtwr ngrde kx trmrlztiwxu nimu. A' nzpokiang, murde krlz Gct kx mrlzti-zlwzx nimu. ¹² Ncblo lcng tzipibqtilr ninge nzrpilr kx rsakrlrkr badr mz nzprtr-krdr mz nzwzngr kcpwz tqalekr. A' sa na-ale-zvzx nqm q krnge mz nzwztr-nrbalq-krbo mz leplz, murde na-awx-nabux nzglqpx-lzbq-krdr lc.

¹³ Murde ncblo kxdrka'ngr lcng tzesabrtlr nimu mz nzrpi-krdr kx nidr aposol neng Kraes, a' trnznginidru aposol angidr. ¹⁴⁻¹⁵ Bzkq kctipxamu nidr. Murde kxmule-esz' ncblo lcng tzapusr-lzbq-ngrdr kxnzawzng ne Gct, a' nzvz-nqblqlr nqm q kr kxetu rdr Setzn, kc tqapusr-lzbq-kai-ngrde enjrl kxluli ne Gct. A' mzli kc nayzlu-ngrm Jiszs, sa na-ayzlubz Gct badr nikeng nzalelr mz nrlc ka.

¹⁶ Nzmu narpiamu kx ngqngux, mrlz

* **11:9** 11:6 Mwx Pol ycmnetr-ngrde nzamrlz-krde nrkrdrdq leplz x nzale-krde da kxnzktipxng mz zmatq ngr Mqngkxtr. 11:9 Nqm q kr Pol bletipxzbz mz nqm q kr aposol kxnzpokiang. Murde nzrlx-zvzbzng trau kxkqlu mz lr Korint mz nzaetunepx-krdr trau scdr x zmatq ngrdr.

nzlalztq-krmamu bange nzglqpx-lzbq-krnge mz nzymne-ngqngu-krnge, da kc tqwaipeamu mz nzlalztq-krbzmu mz ncblo lcng tzglqpx-lzbqng. ¹⁷ A' nzymne-krnge trapuleu nzymne-nqblq-krnge Kxnmcp. A' nzglqpx-lzbq-krnge apule kxnzngqngung kcng tzbtri drtwrdr nzglqpx-lzbq-krdr. ¹⁸ A' mz nzlalztq-krbzmu mz nzglqpx-lzbq-krdr, nalalztq-kzpa'mu mz nzglqpx-lzbq-krnge. ¹⁹ Mz drtwrmu yrplapx-zlwzamu. ? A' myx kxmule tqabrtzlvz-ngrnamu ncblo kxnzngqngu lcng? ²⁰ Murde abrtzlvzamu nidr, kxmule-esz' nzapusr-ngrdr nimu kxnzawz nedrng, x nzrlx-zvzbzng bamu trau kxkqlu, x nzesabrtlr nimu, x nzobqszolr nimu, x nzamyatibzlr drtqmu mz nzviplatr-krbzlr blzmr naomu. ²¹ Drtwrnge vztz zlvz murde nigr ncblo kxnzmaneng x rblx nzvz-nqblq-krgr nqmq krdr.

A' abrtzlvz-kzamu nzlalztq-krbzmu mz ncblo lcng nelzdr tqbr mz nzglqpx-lzbq-krdr. X mzli ka nalalztq-kzpa'mu mz nzymne-ngqngu-krnge, murde nelzng br kx sa namyaszpx nidr mz nzglqpx-lzbq-krngeng. ²² Nzglqpx-lzbqng mz nznigini-krdr lr Hibr, a' ninge kz. Nzrpilr kx nidr leplz neng Gct mz nznigini-krdr lr Israel, a' ninge kz. Nzrpilr kx nzvzpxmqng mz nqvi lr melrmqgr Ebraam, a' ninge kz. ²³ Nzrpilr kx nzwztrpzng mz Kxnmcp. X kxmule-esz' lukurnr-ngrne mz nzpi-krngele, a' nzwztr-krbo bade myaszpx-zlwzle nidr, mz da lcde seleng. Vz zvz nzyapwxtipx-krnge Nrpakxmrlz. Nzadwa-trngr ninge mz presin nzwzrde kqlu. Nztabwxti-krdr ninge nzwzrde kqlu kx ycpwz pipz nzbz-krnge. ²⁴ Nzwzrde nzlvqn kxnzetu r lr Jiu nzikla-

krdr ninge. X mz nzwrde lcng nzlvqn, nzwrbz nzpnu-tq-nrade-rpwxmz (39) lxblr. †

²⁵ Nzwrde tq nztzng lr Rom ninge mz dapunc. Nzwrde esz' nzvaebrtingr ninge mz rplz. Nzwrde tq mnco-ngrmc mz lcsu kx nzwxlzng. X mz kzdq mzli lcdeng, lvabetilzx mz dapunc prla z bq kx yc atwrnrngr esz'. ²⁶ Nzwrde kqlu kx vzpx-ngrne mz nzwztr-krbo mz Kxetu. X mz nzvzpx-krngeng amrlx prtilzle ninge da kxtrka kxkqlu. Murde rmctix ncblo kxayo, x lr Jiu x kxtrngiulrJiu kcng tzaetqzbzlr drtqnge. X leplz kcng tzpokieng mz nzrpi-krdr kx nidr leplz neng Jiszsz, nzatrkatikzlr ninge. X rmcti-kzx nubla ngr lue x trlipu kxetu prla. Kxmule-esz' mncx mz mztea o peto, a' da kxtrka nzprtilz-zvzlr ninge. ²⁷ Yctxbz nzwz-kato-krnge x kzdung mzli trmwi-pnzwxu. X mzli kqlu kx trpnzngr nange da x mqnge lue, x mzli kqlu kz kx trmu-ngrneu. X mzli kqlu kx baongr drtqnge murde trpnzngr me namnc-ngrne x trpnzngr scnge lrpz. ²⁸ X mou, mz z bq kang kqlu yc txpwz mz drtwrnge lrmakxtr amrlx kcng tzmnczmqng bange. ²⁹ Murde nabznge talvzo zvz mz nzxlr-krnge kx nabzdr ngrgo. X ngyatx-zlwzng drtwrnge leplz kcng tzataolr nidr mz alwx.

³⁰ A' mz nzglqpx-lzbq-krnge mzli ka, naglqpx-lzbq-ngrpwo mz da kx aelwapx-ngrde kx ninge

† **11:24** Lou sc Mosis rlr-ngrbzle mz lr Jiu nzikla-krdr ncblo nzwrbz nakrlz-txpwzle nzpnu-kxpwx (40), murde ma tzabzlr nide. A' lr Jiu pnzpe drtwrdr kx nakrlz-txpwzle nzwrbz nzpnu-tq-nrade-rpwxmz (39), murde ma tzipqbrlr-ngrdr lou lc mz nzrlwx-rbr-krdrle, x sc tzkrlzpebzlr nzwrde kx nzpnu-pwx-nrade-esz' (41). [Lou Kcpwz 25:1-3]

ncblo kxmane. ³¹⁻³³ Murde kzdq mzli kx mnc-
ngrne mz taon kxetu Damaskzs, gavzna kc
tqmnclybz mz King Aretas, suti drtwrde nzlolvz-
krde ninge. Zbz sc tqpipebzle mz ncblo ngr
vea nedeng, nzaclve-krdr naobz amrlx ngr taon
lc. A' kzdung lrmakxtr nzokatrllr ninge. X
nzadwaolr ninge mz topla kxetu mz nzapu-krnge
dakxnzng. X nzpetrpzlr nqvi elr, x sc tzavzopelr
ninge nrlarde kx yz ngr bz ngr Damaskzs, murde
nayrbqpxx, mz nzapu-krnge ncblo kc trpnzng
scde zmatq. X Gct krlzle kx trpokiawxu. Nide kc
tqngi Trte Kxetu rgu Jiszs, x nzrglqlz-zvzng
nide tqyc tqyc. Eu. ☆

12

¹ Kxmule-esz' trbatrpwzleu bamu nzrpi-
krmu kx ninge aposol ngrmu, a' naglqpx-
lzbq-mopwo. Murde mzli ka naycmnetrpex
mz nzobq-rmwiblengr x da kx yc-kapq-pnzng
kx aelwa-ngrm Kxetu bange. ²⁻⁴ Yiz nzpnu-esz'-
nrade-pwx (14) kx vztxpe, avzdz Gct ninge Heven
kc tqmyalz-esz'ngr. Trkrlzwxu kx vzdzx mz
nrkrdrdqng kx o mz mqngrnge txpwz mz nzobq-
rmwiblengr lc, a' Gct kx rkrlz. A' krlz-angidrx
kx mncx Me Mncngr Gct. X mz nzmnc-krnge elr,
xlrx da kx rblxm bange nzyapwxtrngr mz natq
ncblo, x nzrpwa'-kz-ngrm bange nzyapwxtipx-
krngeleng. *

☆ **11:31-33** Aposol 9:23-25

* **12:2-4** Mz drtwr lr Jiu, Heven
kc tqmyalz-esz'ngr nide 'Me Mncngr Gct.' Nzrpi-kzpz 'Paradaes'
mz natq lr Inglis. Krlc me navzki leplz kxnzrlxngiting mz nibr
nzbz-krdr. Mc kz Luk 23:43 x Nzaelwapxng 2:7, x natq lc mrkc
Nzalvztr-ngrng Kxmyapxbz.

⁵ Glqpx-lzbq-ngrne nzobq-rmwiblengr lc, a' Gct kx aelwapx-ngrm bange. Mz nzmu-krde lcde, glqpx-lzbq-ngrne da kx aelwapx-ngrde kx ninge ncblo kxmane. ⁶ Kxmule-esz' glqpx-lzbq-ngrne da kx obq-rmwiblex, a' trycmne-ngqnguwxu. Murde napitxpwo da kx ngi da angidr. A' trnaycmnetrpewxu mz da lc, murde ma tqamatq-zlwzamu ninge mz nzobq-rmwible-krngeng. Murde suti tpxwz drtwrnge kx leplz naglqpxlr ninge mz nike nzmclr alex, x nzxlrlr pix.

⁷ X ninge kz, trmrlzu nzglqpx-lzbq-krnge mz nzobq-rmwible-krngeng. Mz nzmu-krde lcde, rlr-ngrm Gct nzprtr-zvz-krnge mz kzdq nzkx-pungr. Murde nakrlz-angidrx kx trpnzng scnge zmatq, a' namnc-xglex nide. Nzcxpungr lc ngi menrpa kc tqatwzlr-ngrm Setzn mz nzapu-krde dxpa' kx luplxti-zvzle nrkrdrtnge. ⁸ Nzwrde tq kx rlxti-ngrbo mz Kxetu nzkatxpx-krbzle nzcxpungr lc bange. ⁹ A' rpimle kx, "Zmrlz rnge kxmyalz takitr-zvzde nzokatr-krde nim, kxmule-esz' da kx nzprtzng. Murde zmatq rnge wz angidr mz nzmnc-xgle-krm ninge mz mzlir nzcxpu-krmqng." X mz nzlxngiti-krnge da lc, abrtzlvzx nzngini-krnge ncblo kxmane. Delc tqgqlpx-lzbq-ngrne mz da lc, murde zmatq ngr Kxnmcpx na-aelwapx-ngrne mz nzlu-krnge. ¹⁰ Mz nzmu-krde lcde, kxmule-esz' ninge ncblo kxmane, x leplz nzpibqtilr ninge, x da kxtrka nzprtilzlr ninge, x leplz nzaetqbzlr drtnge, x prtrx mz nzcxpungr, a' abrtzlvzx da lcngr mz nzvz-nqblq-krnge Kxnmncpx. Murde zmatq ngrde wz-angidrm bange mzli kc tqmnc-xgle-

ngrne nide.

¹¹ Nimu kx rbatrp bange nzymne-ngqngungr mz nzglqpx-lzbq-krnge lcng. Murde nimu kx takitrde nzglqpx-krmu ninge mz nzmrlzkr nqm q krnge. Murde kxmule-esz' ninge ncblo kxmane, a' krlzamu kx myaszpxx ncblo lcng tzrpilr kx nidr aposol kxnzmyalzng. ¹² Murde mzli kc tqmnc-ngrgu, aelwapx-ngrbo bamu kx ninge angidr aposol, mz nzale-zvz-krnge rxx, x da kxnzktipxng, x da kxmatq kxkqlu mz zmatq ngr Gct. ¹³ Apusr-ngrne nimu da kc tqwaisr-ngrne lrmakxtr kc-kzng tzmncilmqng bange. A' da esz'txu kx tr-rlr-ngrpou bamu, nzokatr-krmu ninge mz trau. Nzmu kx tqatrkatix nimu mz da lc, rlxti-zlwzbo bamu kx mw x elx naipqamu ninge mz nabzmu.

¹⁴ Mzli ka ycpe pipz nzvzkr-mopwo bamu mz nzwrde kratq. X sa navz zvz trnzrlr-krpou bamu nzokatr-krmu ninge mz trau. Trsutiu drtwrnge nzka-krmamu dztumung bange, a' suti drtwrnge nzka-krmamu bange nabzmu, mz nzamatq-krmu ninge. Murde nimu doa nengeng mz Kxnmcp x. X trtakitrdeu doa nzaclve-krdr trtedr. A' takitrde trtedr ncd r lxedr nzaclve-krdr doa nedrng, da kc tqwaix mz nzaclve-krnge nimu. ¹⁵ Delc abrtz-zlwz-ngrne kx trpnzng da kx lolvz-moux mz nzokatr-krnge nimu, murde mrlztix nimu mz nabzng atwrnrngr. X mrlz kz nzmrlzti-krmu ninge kxpipz.

¹⁶ Mz trnzrka-krpwa'muu lc bange trau, kz-dung leplz nzrpilr kx esabrtix nimu x sa nap-natix trau kcng tqatakqtiamu mz nzokatr-krmu kx trpnzng scdr da. ¹⁷ A' nzpokiang, murde

ncblo kcng tqatwzlr-ngrbo bamu trnzatrkatilru nimu x trnzpnatipwzlr dztumung. ¹⁸ Murde mz nzatwzlr-krbo Taetus, atwzlr-kz-ngrbo kzdq mzlegu badr. X krlz-angidramu kx Taetus tresabrtileu nimu mz nztwz-krde trau scmung. X nqm̄ krgr esz' mz nzm̄nclz-krbzkr mz Mqn-grkxtr. †

¹⁹ Mwx mz drtwrmu rpiamu kx yro-ngrgr da lcng mz letz lc mz nzaelwapx-krgr nztubq-krgr. A' trtingr! Murde yrtoxopwzkr da kx suti drtwr Kxnm̄cp̄x n̄zpipx-krbzkrle bamu. X mz nzkr̄lz-krgr kx Gct obqom bagr, da amrlx kcng tqalekr x tqpikr ngi dalr nzaxplr-krbzkr nzrl̄xngiti-krmu, murde mrlzti-zlwzkr nimu. ²⁰ Mwxl̄rtix kx mzli kc nakrlz-ngrbo nimu, trna-abrtzlvzwxu nimu kcng tzp̄txp̄x-ngrdr da kcng tq̄pībo bamu mz letz kc pnz. Murde vz-rbrbeamu mz nzotabl̄r-lzbq-krmu, nzdobu-krmu, nzngyagr drtwrmu, nzota-krmu, n̄zrpibq̄ti-krmu, n̄zpokia-krmu, n̄zgl̄q̄px-lzbq-krmu x nzayct̄x-krbzmu n̄zwzkr leplz. Nzmu kx tq̄mule lcde, sa trna-abrtzlvz-kzwamuu ninge mz nzayrl̄plap̄x-krnge nimu. ²¹ X m̄wxl̄rti-kzx kx Gct sa na-amyati-mople drtq̄nge, murde gl̄q̄px-lzbq-ngrne nimu mz n̄zngini-krnge trtemu mz Kxnm̄cp̄x. Trm-rlzu nzayrni-krmu ninge, murde kzdung nimu n̄z̄p̄txp̄x-ngrdr n̄ztekq̄tr-krdr nqm̄ nr drtwrdr mz alwx ngrdrng. A' vz zvz nzamyati-krdr drtq̄dr, n̄zrmwimi-krdr leplz kx trngiu kr̄nalzdr, x n̄zamq̄miti-rbr-krdr mz nr̄krdr̄tq̄dr. ☆

† **12:18** Lr Korint n̄zamrl̄ue-zlwzlr Taetus. ☆ **12:21** 2 Korint 2:1-4

13

Nzlc-apqzbkr Pol Kxrmnr-ngrbz Mz Krkcng Tzrpwa'-ngrbzlr Nzwz-krde

¹ Mzli ka nzwrdede kratq deka naoklati-ngrbo nimu. X mzli lcde, sa na-ayrplapxx leplz kcng tzrpilr na-atrkatilr nzwz-krnge. Murde sa navz-nqblqx Nzryrngrkxtr mz nzrpi-krde kx, “Bzkq rpiq kx doa vz-rbrpe, a' mz nzymne-krbzme natubz du mz nibrm leplz naesz' o nali kx nzmc-kzlr nzvz-rbr-krde.” ☆ ² Mzli kc mz nzwrdede krali mz nzoklati-krbo nimu, rngidrlvz-ngrbo mz leplz kcng tzmncng mz alwx kx natekqtrlr nqm q nr drtwrdr. X mzli ka mz nzmnc-krbo lc rlr, narngidrlvz-kz-ngrpo mz leplz lcng badr leplz kc-kzng tzmncng mz alwx mzli ka. Murde mzli kc navz-ngr-mopwo, trpengr doa kx nayc mz drtwrge nide, a' sa na-ayrplapxx leplz amrlx kcng tzvz-rbrng. ³ Sa na-alex da lc murde kzdung nimu leplz nzrpilr kx nzm na-aelwapx-ngrbo nznrgisc-krnge zmatq mz nzngini-krnge aposol ne Kxnzmcp. X sa namclr zmatq lc mz nzayrplapx-zlwz-krnge nidr. Murde trnavz-nrwx-ngrpou badr. ⁴ Mzli kc tztqlvztrngr Kxnzm-cpx mz kros, opxm kx trpnzngr scde zmatq. A' mzli ka lupe mz zmatq ngr Gct. Mz nqm lcpwz, mz nzaxvctr-krbzkr bade, rpiamu kx trpnzngr scgr zmatq mzli kc tqmnc-ngrgu. A' sa namcamu kx prtr-kzpzkr mz zmatq kc tqatulzmlc nide mz nzbzng, mzli lc na-ayrplapxng nimu.

⁵⁻⁶ Naobqtitramu nabzmu. Doa kx esz' mz nimu, nakrlzle kx Jisz mncpxm mz nabzm o

☆ **13:1** Lou Kcpwz 17:6; 19:15; Matiu 18:16; 1 Timoti 5:19

trtingr. Murde nzmu kx tqlxngiti-angidrpeq Jiszs Kxnmcpkx kc tqbz-ngrde nim, nakrlz-kzq kx abtrtpzme drtwrm bade mz nzyapwxtipx-krbzk nide bam. A' doa kx Jiszs trmncpxpuu mz nabzde, trnginideu kxrlxngiti angidr. ⁷ X krka'bzkr mz Gct kx trpnzngr nimu kx navz-rbr mzli kc nakrlz-ngrbzk nimu. Nzkrka'-krgr lc trvzpxpuu mz nzsutikr drtwrgr leplz nzkrz-krdr zmatq ngrgr mz nzayrplapx-krgr nimu. A' nzkrka'ngr lc vzpxm mz nzsutikr drtwrgr nzale-krmu da kxtubq, kxmule-esz' leplz trnzmcrlu zmatq ngrgr. X mz drtwrgr, trngiu da kx myapxbz nzaelwapx-krgr zmatq ngrgr. ⁸ Murde zmatq lc trngiu dalr nzayrplapx-krgr leplz kcng tzvz-nqblqpelr Nrpa Angidr. A' zmatq lc ngi dalr nzvectr-krmgr leplz mz nzlxngiti-krdrle. ⁹ X mzli kc tqlolvz-amqngi-ngrnamu nzrlxngitingr angidr, abrtzkr kxmule-esz' zmatq ngrgr yc-kapq. Murde krka'-zvz-ngrgr kx nzrlxngiti-krmu nabr. ¹⁰ Dekc tqyr-ngrbo letz lc bamu mz natq kx xplr mz nzmnc-rlru-krbo bamu. Murde mzli kc nakrlz-ngrbo nimu, trsutiu drtwrnge nzayrplapx-zlwz-krnge nimu mz zmatq kc tqkam Kxetu bange. Murde zmatq lc ngi dalr nzokatr-krnge nimu mz nztu-amqngi-krmu mz nzrlxngiti-krmu, a' trngiu dalr nzamyati-krbo drtqmu o nzatrkatikr-krnge nimu.

Natq Ngr Nzarlz-lzbqngr

¹¹ Mzli ka, kx mzlangeng x inwengeng, naelalz-ngrm drtwrmu Kxetu. X nzrlxngiti-krmu nabr mz nzvz-nqblq-krmu natqngeng, mz nzesz'tikr drtwrmu, x mz nzmnc-zpwx-lxblr-krmu. Murde

mz nzale-krmu da lcng, Gct kc tqrkam nivz x nzmnc-zpwxngr, sa namnc mz mzlirmu. ¹² Mz nzmcti-lzbq-krmu, male-lxblramu mqmu mz nivz.

¹³ Leplz ne Gct amrlx kcng tzmncng mrka Masedonia Provins, nzrpibzlr bamu kx, "Nimu la."

¹⁴ Krka'-ngrne kx nivz lr Gct, x zmrlzkxmyalz ngr Kxetu rgu Jiszs Kxnzmcpx, x nzodutr-lxblr-krmu badr Mqngrkxtr, nayc-zvzbz bamu.

Delape, Ninge *Pol.*

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f